

四庫全書

集部

欽定四庫全書

宛陵集卷四十七

宋 梅堯臣 撰

觀邵不疑學士所藏名書古畫

野性好書畫無力能自致每遇高趣人常許出以視邵

侯多奇玩留我特開筭首觀阮與杜驢上瞑目醉

阮籍  
杜甫

韓幹貌四馬臨流解鞍轡花驄照夜白正側各畜意繫

衣穿袴鞵坐立皆厰吏精神宛如生于顯復穿鼻梅雞

徐熙花竹間寒雀睡逸少自寫真對鏡絕相類數本失

姓名古胡并老驥山水樹石硬荆關藝能至荆浩

關種

巨然

李成者落筆愈奇異人物張僧繇雖傳恐非是其餘又  
莫究模搭似未備周秦已來書行草楷篆隸聲名舊烜  
赫一一果可喜邵侯愛我曹咸使紙尾記况侯有古學  
小字刻珉翠各贈墨本歸懷寶誰肯忌

先至山陽懷杜挺之

與君同川塗舟發偶後先順風吹我帆已過飛鳥前寄  
聲託飛鳥微意或可傳定逢檣上烏暫向彼留連薄暮

楚城下踟躕問來船

絕句五首

風過已午未肯止酒病嬰我心無憊  
船頭拍翅野鴨浴  
水上擺子獐魚跳

岸邊穉子戲把釣蚯蚓作餌青條長  
上去下來船不定  
自飛自語燕爭忙

夜欲三更飢鼠鬪燈殘一點小星紅  
邨邊坎坎賽神鼓  
船底摐摐駕浪風

葑田青灰博奕局  
島樹墨楹煙雨圖  
已去揚州百餘里  
回頭還隔幾重湖

蝦蟇號沫為科斗  
螺贏銜蟲化細腰  
蠹穴荒陂有多少  
乾風濕雨各飛跳

淮南轉運李學士君錫示卷

李氏世能詩落落為時豪  
漢陵唐太白始競二雅高  
益端正封賀才各傾吳濤  
于今幾代孫手持切玉刀  
功利既及民又將薄風騷  
示我照乘珠光彩生褐袍  
曾非貧

家有懷歸徒增勞神物必難祕恐隨風雨逃

觀王氏書

先觀雍姬舞六么妍葩發豔春風搖舞罷英英書大字  
玉指握管濃雲飄風馳雨驟起變怪文鯨書飛明珠跳  
席客聚立驚且歎筆何勁健人柔天昔時裴旻能劍舞  
丹青助氣精神超藝雖不同意有會世事相假非一朝  
書二客論呈李君錫學士

我慕杜挺之磊落高世談又愛王平甫才雄天馬驂二

人相議平最重李淮南踈跽文館彥委曲部政諳能蘇  
煮海民變使供租甘雖持使者權不作自裏蠶諄諄無  
威傲雍雍激廉貪書戒易滿人縱愚須起慙始時邊海  
鹽亭民常  
官逋其錢往往給腐米為直弃之而去浸久亭民無本  
多逃者今俾中戶就邑納租給亭民民乃大利逃者復  
還

留別李君錫學士

淮南尚喜風流在客有殷勤載酒過不醉不歸情可見  
相看相笑意如何瞭眸自解持高論長頸稀逢缺善歌

舊愛陽關亦休唱西還從此故人多

過山陽水陸院智洪上人房

有蘇子美墨蹟

十載七來此每嗟多異今池灰休辨劫川月解明心遺  
墨悲蘇倩高情想遁林能閑常似舊翹立水邊禽

淮陰侯

功既高天下身何不自防已能成漢業無復假齊王復  
恥噲為伍安知呂所忘空名流未竭淮水共湯湯

閏三月八日淮上遇風杜挺之先至洪澤遣人



來迎

曉出淮口時夜來風已止半路逢怒號客心愁欲死忠  
信雖可仗魚鼈將異此但暮前行舟漸入孤汊裏猶能  
有餘力遣助良可喜

宿洪澤

舟子起添纜夜潮同雨來寒聲相亂急遠夢自然迴水  
鳥鳴還睡風燈暗復開宦游嘗作客未息為貧催

泗州郡圃四照堂

官廬客舩滿淮汴車馳馬驟無閑時豈有餘力事棟宇  
後園荒草長離離朱侯下車百職舉亦治宴豆頻遊嬉  
梁冠爵弁各得禮道路溢譽亡高卑因隙作堂名四照  
虛光轉納娥與羲面面懸窗夾花藥春英秋蕊冬竹枝  
射堋寬闊習武事鏡沼清淺吹文漪侯之此意寧自樂  
夷情勞士俱忘疲後來出口勤灑埽莫作廩塲生蒿藜  
泗守朱表臣都官叔北園

樹藝北壕上直對高城陰使君朱輪來歌管樽酒深風

雷生淮雨雲物冒楚岑戰舳習追逐飛凌捷水禽不獨  
耳目觀乃見預禦心事閑賓從樂景美臺榭臨今人忘  
羈旅灑慮起微吟

依韻和誠之淮上相遇

一別逋翁久不逢亦知諸葛臥龍中幾年三致千金富  
今日重追二謝風形槁已能同散木鬚霜從聽著寒蓬  
飛光入酒舊時月來照狂歌猶未窮

泗州觀唐氏書

唐氏能書十載聞誰教精絕向紅裙百金買書蒲葵扇  
不必更求王右軍

同朱表臣及諸君游樊氏園

五年前上去乃從許公過舊物此君在後生新筍多朱  
櫻繁且熟黃鳥啄仍歌一一如當日乘高奈興何

七里灣得朱表臣寄千葉樓子髻子芍藥

誰稱為近侍宜與牡丹尊霞綵千千葉香撩黯黯魂紅  
樓思俠少寶髻奉王孫賸插不堪照顏衰汴水渾

併日得朱表臣酪及櫻桃

昨日酪將熟今朝櫻可餐  
紫純休定價黃鳥未新殘  
甘滑已相美齒牙仍尚完  
應知消客熱遠贈盎盈盤

阻淺挺之平甫來飲

泛淮忌水大我行浩以漫  
汴汴忌水淺我行幾以乾  
偶與困滯并將獨為此難  
窮隄有來客芬芳可與言  
共休綠榆陰置酒聊慰安  
主人雖倉卒猶得具甘酸  
酸漬楚梅青甘摘夏櫻丹  
引觴吞日光耳熱不復歎  
俛仰已陳

迹未可忘茲歡誰思費生術幻惑寧盤桓

依韻和表臣奎野亭

淮光抱城去山翠落樽前魯叟欲浮海楚人休問天野  
雲將拂幔水鳥不驚船歷覽誰能賦今聞太守賢

依韻和表臣先春亭

雜花紅間白遠樹短參長天近春歸疾城高地易涼千  
尋浮遠水五兩動連檣置酒未終樂山煙生暝隍

和表臣河南庾署西軒

飛鳥欲下蟾生時斜光冷魄常相隨右山左水清洗目  
虛簷曲檻生揚眉白魚甘肥網可得公酒美滑杯可持  
臨淮使君有閑佚長橋直度來莫遲

依韻和表臣見贈

中間會與別不啻二十年向來君之官我必贈以篇今  
過臨淮郡惠好情聯聯訪我車騎都宴我鶯花然此當  
舟航衝旅泊逾百千迂高而撫下酒壺檀食連使予一  
日為立可見華顛遽行恐勞君數里不得前三月汴水

淺蹇滯無我先君乃遺我詩盛稱我為賢比之少陵豪  
望我何太全又令入時用目堪事高眠安能事孔聖終  
學美周宣勤荅以明懷矢辭敢欺天

依韻和表臣聞與挺之宣叔平甫飲

舟淺不能進反羨車馬馳同行各在野有酒相與期隄

上聞禽處桑間落日時使君羊筍贈更飲更追隨

表臣是日

送蒸羊  
筍束

表臣惠蜀牋偕玉硯池



蜀牋珉硯池為贈知雅故慙無右軍書亦乏左思賦環  
水象辟雍紋花如織素願傳君德政況已聞行路

表臣以阻水見勉次其韻

野叟津難問賢人酒不空行吟同去國退翼欲乘風憂  
已先天下窮方坐井中予生一如此安得免衰翁

聞宣叔挺之圍碁

人以碁銷日我觀碁輒寐未必盡死生何茲較愚智只  
將多勝少復取生為利不若酒之賢悠然共醒醉

五情篇

奏方響  
琵琶

倩然五蛾眉妙曲動金絃  
犀推玉鈴鈴龍撥雷鞀鞀響  
急能愈靜意閑情常專  
主人昔結客一醉百金捐  
觀濤來吳都遇我泗水邊  
夜飲向明月非同聞鄰船

釋悶

呈挺之  
平甫

燕丹未歸馬未角  
卞子抱玉無兩脚  
孤城食盡兵未却  
度笮中懷挂一索  
我輩於此酒宜酌  
百歲千秋奈何樂

釋滯

帝在蒼梧妃泣竹蘇武餐毛海西曲窮山遠道車折軸  
深井渴汲綆不續我輩於此酒正綠賢無奈何歡且足

依韻和表臣憶遊竹園山寺

山攜謝公妓竹似阮家林花發日初暖鳥啼春欲深朱  
櫻連葉摘綠酒帶醅斟猶想聞歌吹僧房未暇吟

依韻和挺之晨起見寄

時阻  
汴淺

淺水不堪泛暗灘時激聲晨都望迢遞窮旅思屏營芳  
草同誰藉投壺自喚名得君晨起詠遠遠見交情

李宣叔祕丞遺川牋及粉紙二軸

蜀人擣玉屑楚客調金粉製牋君有贈草疏我無蘊宜  
書揚雄辭莫寫屈原憤誰識此意微曾非事搖吻

錢志道推官遺紗帽

遠贈烏紗帽能無白也詩山花不更插野客莫驚窺

次韻和表臣惠符離去歲重醞酒時與杜挺之

李宣叔王平甫飲於阻水仍有筍醬之遺

贈以榴花酒沉清賈隔年不憂航滯磧為汎琰如船加

品盈盤內無花到眼前還招李杜醉野釀莫稱賢

表臣齋中閱畫而飲

嘗觀韓幹馬人物亦如生君收四病骨無肉只崢嶸二  
匹痒磨樹二匹縱其情意思若不任千里未可行古絹  
蠹已盡彩色無精明歎惜傳至此幾人金帛輕隋時有  
名筆獨寫嚴君平猶持杖頭錢罷肆心莫營魁然中譽  
人坐榻不知名畫中有畫屏山石侔天成今時長沙叟  
獼猴擗林橫疏毛與設色前代何角爭餘存品雖高我

未易敢評主人愈好事緘笥酒壺傾

寄送許待制知越州

喜公新拜會稽章五月平湖鏡水光  
菑菑花迎金板舫  
葡萄酒瀉玉壺漿  
雲歸秦望山頭靜  
雨洗若邪溪上涼  
天子不能煩侍從  
可將吟咏報時康

依韻和王司封離白沙塗中感懷

淮雨夜飛氛祲銷  
星纏歷歷轉隨杓  
黃童謾對日如月  
賈誼休悲鵬似鴟  
市骨已知求駿馬  
輜車何用載田驕

不唯忠憤心如此王佐才高賦小鵲

將赴表臣會呈杜挺之

莫怪去遲遲予心君亦知膝前嬌小女眼底寧馨兒學語渠渠問牽裳步步隨出門雖不遠情愛未能移

醉中和王平甫

用其韻

王瓜未赤方牽蔓李子纔青已近樽我最年高雜年少風流還有杜陵孫

將解舟走筆呈表臣

昨夜謳吟瀉春酒今朝波浪下黃河主人不暇恩恩別  
為倩流鶯寄語過

荅再和

舟行纔及二三里已復淺流如凍河君有短書誰遠寄  
時因燕子拂牆過

非意篇呈表臣

人言廚傳繁乃是郡久例一日苟不脩未免衆吠睨飽  
尚謫所興飢必愠不細損之禮漸墮存之禮未替心莫



忽賤微義莫徇譽勢我將取是然敢以為君計

依韻和錢深推官見寄

無才不敢學陽秋嗜酒時能問大酋前日偶從河上飲  
文章何可並英遊

依韻荅宣叔行舟相隔見寄

汴漲濺濺費挽牽輕舟難若上青天只知乘駛及先去  
不意遲留落那邊

力漕篇呈發運王司封寶臣

兵外肢強兵內體壯斂之盡歸歲以多餉東南軸艫銜  
尾而上浮江浮淮汴汴之湍汴湍不常水衡不官惟虞  
溢毀靡虞舟槃舟槃糧覆糧孰為足大計之數萬百惟  
六帛幣錯貨三倍其穀曰主厥漕王之蓋臣日憂河涸  
運智煩神以舫實土約流東津百步之間若牙與齧朝  
漲夕降滯舸次鱗亟乞于朝朝不即報下上經營風并  
日曝其躬其勤秉心有操士豈無祿視此則冒彼以榮  
佚此以劬耗願荅其劬錫命錫誥

四月十三日唐店寄錢推官

昨夜月如水君能攜酒來  
破除愁悶去洗蕩肺腸開  
露氣林間落河聲地底迴  
相知不須早語合自無猜


徒步訪李宣叔宣叔有詩依韻答

渡河誰道去我重子雲才  
鴻鴈汀洲去牛羊井落徠  
乍行初覺倦暫語不能該  
日色看看暮將歸意復迴

荅高判官知唐君夜飲

露宿勤王客相從月下來  
黃流何日漲綠酒暫時開  
風

定燈花爛天高斗柄迴醉言多脫略吾黨不須猜



宛陵集卷四十七

欽定四庫全書

集部

宛陵集卷

四十八至  
五十一

詳校官庶吉士

臣張溥

檢討

臣

何思鈞覆勘

覆校官博士

臣

劉光第

校對官主簿

臣

汪日贊

謄錄貢生

臣

許立堅

欽定四庫全書

宛陵集卷四十八

宋 梅堯臣 撰

依韻和劉原甫舍人赴揚州塗次贈予翩翩河  
中船

我船緩而西君船迅而東緩迅各所尚不意中路逢驥  
馬方騰雲野鶴還就籠亦言出處異同是天地中我豈  
不知命人空嗟其窮何當遂逸性川上作釣翁

聞禽

禽鳴脫破袴定無新易故此語莫相譏善貧知有素

表臣都官至十三里店

風雨催車騎駸駸來自南道傍有茅屋寧容使君驂不  
謂忽下馬濕衣逢我談田家已刈楚田婦正好蠶既將  
國漕急復與民事諳他年此茅屋便比棠樹甘

泊徐城寄杜挺之王平甫

十里五里一值淺千愁萬愁過徐城王君論與河流阻  
杜老談思月色清岸若屹牆空自面樹如張蓋欲誰傾



二人儻及親朝夕更晚更遲何計程

至第四鋪二首

第四鋪前風雨急搭河過盡不憂灘却愁蓬溺空征橐  
始信人間行路難

輕舟已過第四鋪憶著陽關末尾聲悵悵杜公行底急  
白醪何處得同傾

倡謳歎

萬錢買爾身千錢買爾笑老笑空媚人笑死人不要

過青陽驛使風

天應憐逆旅，乞與順風初。  
不假卒添力，任從帆自疎。  
燕攬舟尾健，鷁漱水花餘。  
會與王都近，何須問疾徐。

蠅

乘炎出何許，人意以微看。  
怒劒休追逐，疑屏漫指彈。  
與蚊更晝夜，共蜜上杯盤。  
自有堅冰在，能令畏不難。

蟬

柳上一聲蟬，沙頭千里船。  
行經朝雨後，思亂暑風前。  
物

趣時時改人情忽忽遷感新猶感舊更復幾多年

鶯

綠柳陰猶薄黃鸝轉已清年年舟上客處處樹頭聲  
歸佳人語依稀太子笙夕陽聽不足飛入舊荒城

雞

昂然大雄雞高冠紫沉羽星占太史局樹棲丞相府  
知時不失晦得食曾呼伍幸無終夜鳴須防人起舞

鶴

何時別遼海俛啄雜庭鷗去作仙人駕來乘衛國軒雲  
中晴引喉松上舊能言俱說長千歲予非學羨門

挑燈杖

油燈方照夜此物用能行焦首終無悔橫身為發明盡  
心常欲曉委地始知輕若比飄飄梗何邀世上名

蛙

陂蛙怒目生科斗亦縱橫自得君王揖能為鼓吹聲越  
人嘗入饌秦客不須驚誰解緣明月徒誇兩股輕

鳩

一世為巢拙長年與鷗爭欲知雲脚雨先向屋頭鳴頸  
上玉花碎臆前檀粉輕何時將刻杖扶助老夫行

蚊

向晚化污積羣飛來戶庭蟪蛄許巢睫琥珀為留形夜  
色徧容蔽雷音亦感聽猶矜負山力血食也需醒

鹿

羣處空山中跡在深松下周穆得同狼秦人指為馬驚

顧遠世網脫質去田野誰思充股脩自是全無者

犬

常隨輕騎獵不獨朱門守鷹前任指蹤雪下還狂走人  
思上蔡遲書寄華亭後莫將呼作龍梁肉纔經口

豕

司原豢俗豨日見容陰昵喜比為白麟惟憂不豐溢烈  
飈澤雨作真聲向人出司原悔何由肝膽空駭慄

蛟

橋邊三尺劒江上六鈞弧漢武帝何處周將軍已無織  
綃深有室泣淚自為珠誰為九淵害人猶能爾圖

兔

迷蹤在塵土衣褐戀蓬蒿有狡誰窮穴中書惜拔毫獵  
從原上脫靈向月邊逃死作功勲戒良弓合自弢

魚

洛水美鱖鯉入河西去時三春登玉浪一日到天池垂  
釣豈容羨小鱗應莫隨腹中無匕首已不助吳兒

龜

玉府有寶龜名存骨未朽初為清江使因落豫且手白  
玉刻佩章黃金鑄印紐辭聘彼莊生曳塗誠自有

鰕

自生江海涯小大形拳曲宮簾織以鬚水母憑為目  
將蔽其私賤用資不足於物豈無助况能參鼎肉

至靈壁鎮於許供奉處得杜挺之書及詩

去冬過尋歷陽守江沙半遮當利口口頭沙颶浪如山



浦溆排舟魚貫柳却畏浪高難苦留聞解符來時不久  
平明挂席入揚州主人釀成百斛酒酒上玉蛆如笑花  
一日倒空罌與缶主人亦欲君舊友請我遲君同此首  
清明君果渡江至與君繼舳曾無負過淮風緊到洪澤  
使人助我如臂肘暮春汴汴流澀自假輕航去如走  
千憂萬阻經靈壁留書津吏情何厚副之佳句二十言  
文昌光芒夜侵斗平時相恤以此稀緩急求之更難有  
風牽月挽望符離水館野亭能駐不葛巾輕服約登步

葱臙冷淘誇甚滄書中不說王平甫應又先行君在後  
我今趣君君趣王趣入大梁須執手

永城杜寺丞大年暮春白杏花

孤素發殘枝非關比衆遲殷勤勝莒葉重疊為農時

午日三首

有酒不病飲况無菖蒲根空懷楚風俗角黍弔沉魂  
佳人五色縷道士絳囊符瘦臂不中繫百邪何用驅  
百草堪為藥舟行不及收岸傷蕭與艾從聽到寒休

晚得菖蒲

薄暮得菖蒲猶勝竟日無我焉能免俗三揖向樽壺

祭貓

自有五白貓鼠不侵我書今朝五白死祭與飯與魚送  
之于中河呪爾非爾疎昔爾齧一鼠銜鳴遶庭除欲使  
衆鼠驚意將清我廬一從登舟來舟中同屋居糗糧雖  
甚薄免食漏竊餘此實爾有勤有勤勝雞豬世人重驅  
駕謂不如馬驢已矣莫復論為爾聊歛歛

依韻和酬太師杜相公

衍

相國推心本至平，欲揚蕭艾作蘭馨。  
孤根易變終微賤，美澤難霑漫晦冥。  
楚客嘗聞紉若若，王孫誰復顧青青。  
東風已與生成足，不敢希冀在帝庭。

依韻荅僧圓覺早梅

江南自寒苦，花不與時同。  
清向三冬足，香傳一國中。  
雲湖藏舊市，雪樹認新豐。  
未有虧冰素，隨妝入漢宮。

雍邱遇雨

日暮風雨急逆水舟難牽波波入杞國悄悄誰憂天閨  
閨陂中雷轟轟隄外煙驟然沃大熱蒸飫如炊煎飲水  
徒脹滿渴喉殊未蠲搖蓬已煩倦汗額常不乾如何一  
席地長少皆在前衣巾不敢去又以禮數纏安得化嚴  
石兩脰沒流泉每暑起此念念之凡幾年終當逐逸志  
奚必事華顛

廟子灣下作

廟子灣下百尺船杞人楚人相雜牽水底老唇倚以怪

樹頭挂紙吹作錢江蛟海鷗千萬里  
軒風簸日蠻島邊  
長安舊去天尺五此在大梁眉睫前  
高冠長劍乃不畏  
沙雨夜起噴腥涎

留侯廟下作

貌如女子心如鐵五世相韓韓已滅  
家童三百不足使  
倉海君初去相結秦皇東從博浪過  
力士袖椎同決烈  
曉入沙中風正昏誤擊副車搜跡絕  
亡命下邳圯上游  
老父墮履意未別顧謂孺子下取之  
心始不平終折節

舒足既受笑且去行及里所還可說可教後當五日來  
三返其期付書閱他日則為王者師果輔高皇號奇傑  
留國存祠汴水傍逢逢簫鼓賽肥羊赤松不見天地長  
黃石共葬邱冢荒

高車再過謝永叔內翰

世人重譽不重舊重舊今見歐陽公昨朝喜我都門入  
高車臨岸進船篷俯躬拜我禮愈下騶徒竊語音微通  
我公聲名壓朝右何厚於此瘦老翁笑言啞啞似平昔

妻子信說如梁鴻自茲連雨泥沒脛未得謁帝明光宮  
冒陰履濕就稅地親賓未過知巷窮復聞傳呼公又至  
黃金絡馬聲瓏瓏紫袍寶帶照屋室飲水啜茗當清風  
邀以新詩出古律霜顙屢領搖寒松因嗟近代賈莫比  
官為司空仍侍中今成冢邱已寂寞文字豈能留無窮  
以此易彼可勿媿浮榮有若送雨虹須臾斷滅不復見  
唯有明月常當空況我學不為買祿直欲到死攀軻雄  
一飯足以飽我腹一衣足以飾我躬老雖得職不足顯



願與公去歡樂同歡樂同治園田潁水東

李審言相招與刁景純周仲章裴如晦馮當世  
沈文通謝師厚師直會開寶塔院

自君命我飲朝暮雨傾瓦城東與城北大道泥沒馬敢  
忘主人勤顛撲困馭者衆客亦如期陳肴藉蘭若馮裴  
與沈謝辯論過終賈刁周事老成危坐言語寡酒半時  
謔劇揣狀類摹寫或譏項髮禿或指舌端傻或將冠帶  
身勸作梁武捨謂我大耳兒此實已見假又效井市態

屈強體非雅順風手沙沙逆風口哆哆竟席屢絕倒去  
忌肝膽瀉規規豈無儕達識高天下

送周仲章都官通判湖州

溪水日雲雲升峰日峩峩中有水精宮此名其謂何湖  
水傳玉孃揚光遡嫦娥昔人美清夜高樓發微歌風流  
百年餘所歷才彥多我嘗居其下醉舞或傚傚君行貳  
郡事結騎黃金珂容儀苦白晳度橋鳴橈馳士女夾道  
看秋風吹穀羅言是公侯家大體儂弗過問儂底未辨

撐船入芰荷應莫勸蠶織生計非杼梭

依韻答吳安勗太祝

我於文字無一精少學五言希李陵當時巨公特推許  
便將格律追西京卞和無足定抱寶乘驥走行天下老  
玉已累人馬不逢皇皇何之飢欲倒還思二十居洛陽  
公侯接跡論文章文章自此日怪奇每出一篇爭誦之  
其鋒雖銳我敢犯新語能如夏侯湛于今窮困人已衰  
不見懸金規呂覽乃遭吾子求琢磋珠璣獲斗奈我何

吳沖卿學士以王平甫言淮甸會予予久未至  
沖卿與平甫作詩見寄答之

老馬力盡道路長豈若壯驥思騰驤項窮臨流歎不逝  
燕骨埋沒庸可傷我今六十趨南北飢腸不足面黧黑  
少年心志一點無千里區區安所得往居閭門乏經過  
閉戶讀書多廢食便從冠帶向仕塗彊顏希祿非貪職  
昨逢王倩昧平生一見如舊心相傾談經樹下任日炙  
酒狂便欲騎長鯨誰意同行有遲疾先入大梁凡幾日

大梁故人憐鈍衰迭為寄唱辭嚴密卒章言買羊與酒  
雖齒動搖能飫溢亦知紅頰教新成更願舊朋邀六七

宛陵集卷四十八

欽定四庫全書

宛陵集卷四十九

宋 梅堯臣 撰

寄題絳守園池

老柏麝不食古色侵青冥淺沼龍不入秋水生浮萍屋  
屢圯堊幾太守辟上彪蔚遺丹青黑石鐫辭澀如棘今  
昔往來人不識酸晴欲挾無聲形既不可問不可聽懸  
泉瀉竇晝未停飛玉貯藍光入屏苞潭梁島甲癸丁蔓  
刺交綴垂組紵蒼官顙槐朋在庭風蟲日鳥聲嚶嚶卉

葩木果黏枝條集臺脫熱昏痾醒

闕

文韓詩怪若是徑

取一二傳優伶仍寄河東薛太守更與斟酌無閑局

陸子履見過

劉郎謫去十年歸長樂鐘聲下太微屈指故人無曩日  
平明騎馬扣吾扉論情論舊彈冠少多病多愁飲酒稀  
猶喜醉翁時一見攀炎附熱莫相譏

重送周都官

水上朱樓畫角鳴濛濛雨裏倚舟輕未逢甫里先生謁



多見吳興太守迎荷葉半黃蓮子老霜苞微綠橘林明  
十年不到風煙改君去將詩與畫評

送李載之殿丞赴海州權務

瓜蔓水生風雨多吳船發櫂唱吳歌槎從秋漢下應快  
人憶故園歸奈何世事靜思同轉轂物華催老劇飛梭  
茶官到有清閑味海月團團入酒罍

和吳沖卿學士石屏

吳夫子佩銀龜乘天馬素怪奇忽得號畧一片石其中

白色圓如規又有樹與烏畫手雖妙何能為吳乃持問  
歐陽公比公曩獲尤可疑疑不為辨賦以詩詩辭粲粲  
明星垂復遣齋來使我和坐上鉅公旁睨之范侯實有  
揚雄學咸云此理難究推我歸滌慮反覆思義雖不經  
聊解頤月與太陽合朔時陽烏飛上桂樹枝枝上作窠  
生羣兒人不知天公天公欲俾世間見影著石面如黏  
稿烏既不得去月亦不可移留為千古作好玩慎勿傾

撲同玉碑

時在唐書局與歐陽永叔王  
原叔范景仁會食得所示詩

永叔贈絹二十四匹

鳳皇拔羽覆鶉鶉幸脫僵蒿蓬昔公處貧我同困  
我無金玉可助公今公既賈我尚窘公有縑帛周我窮  
古來朋儕義亦少子貢不顧顏淵空復聞韓孟最相善  
身仆道路哀妻僮生前曾未獲一飽徒說吟響如秋蟲  
自驚此贈已過足外可畢嫁內禦冬况無杜甫海圖坼  
天吳且免在褐躬瘦兒兩脰不赤凍病婦十指休補縫  
厨中餒婢喜有望服鮮弃垢必所蒙梁上君子切莫下

吾非陳實何爾容

依韻奉和永叔感興五首

泉上有君子齋祠達主誠向來霖雨暴觸處蛟鼉鳴既  
祈致日出杲杲紓民情天子遣以報固匪媚取名因成  
感興章庶用語平生蹈道久已熟情田不須耕

既負天下望必憂天下責每聞諫諍辭苦意多矯激心  
存義勇赤氣與虹霓白所論言必從豈若水投石陰邪  
日已銷事理頗已得莫將經濟術抑鬱向胃臆

勿驚年齒遲勿歎時節晚  
寒松翳林麓射干生隴坂  
野蓬隨飄飄秋實綴纂纂  
萬物更盛衰有益必有損  
損益皆自然曷增鳧脰短  
人為智慮役白髮安得免  
利澤欲及時唯恐不行遠  
後世豈皆愚計校徒勉勉

日出各馳趨皆為利所迫  
秋蟲至微物役役網自織  
古來高世人林下遺憂責  
扛鼎絕臚者乃自恃以力  
積金苟如山何異魚貪食

唧唧復唧唧長沙何太息  
秋風入破衣瘦婦思補刺  
手

中把長線無帛縫不得夜夜憂向寒斗柄漸垂北嫁夫  
欲夫富歡樂要終極歡樂既未能鬚髮霜花易

依韻奉和永叔社日

玉卵不吞龍嗜肉燕子成兒去華屋老樞半黃田鼓鳴  
樹下宰平誰似玉茂陵常說泣秋風王母惜傳雙鬢綠  
東方伏日思早歸長飢不及侏儒腹豕新烹白醪熟  
奮衣地坐無拘束驪山夜寒坑底哭漫把漆書留冢竹

社日飲永叔家

雨未雨濛濛野田擊鼓賽社翁折條跨馬社翁去醉叟  
臥倒黎葉紅遨頭主人邀客飲玉酒新賜蓬萊宮彭宣  
不預後堂會康成一舉三百鍾更邀明月出海底爛醉  
等是歸蒿蓬

八月十三日觀長星

長星彗雲出天狗欲墮鳴狗埽不見跡昭昭河漢橫河  
漢秋轉淨箕斗垂光晶勸爾長星酒收侵看太平

送李才元學士知邛州

太守車煌煌莫如還故鄉昔登蜀郡籍今得臨邛章過  
家禮耆舊接境跪壺漿寒經道路遠春入山川長俗將  
樂其化詔亦美其良相如有遺跡誰復酒廬傍

弔仲源

世家吳季子皇籍漢諸孫嚙管行車失虛堂隱几存枝  
摧從玉樹星隕自天垣寧復下貧賤停驂來里門

送梁學士知襄州

騎吹荊州去喬林漢水前鄉亭逢故老牛酒問高年翠



嶽臨關路黃柑逐賈船習家池館在賓從與留連

送薛氏婦歸絳州

在家勗爾勤女功無不喜既嫁訓爾恭恭已乃遠恥我  
家本素風百事無有侈隨宜具奩箱不陋復不鄙當須  
記母言夜寐仍夙起慎勿窺窗戶慎勿輒笑毀妄非勿  
較競醜語勿辨理每順舅姑心況逆舅姑耳為婦若此  
能乃是儒家子看爾十九年門閭未嘗履一朝陟太行  
悲傷黃河水車徒望何處哭泣動鄰里生女不如男天

親反由彼

送劉繼鄴秀才歸當塗

鵲雛始出巢欲矜五色羽乃見郡鵲盤壤中將有取梧  
桐與竹實安得在平土所趣固已殊而何不遠舉幸失  
網羅目宜還蘭蕙圃故鄉有嘉林其下可以處會侍朝  
陽鳴賀夔成律呂

送裴如晦宰吳江

吳江田有杭杭香舂作雪吳江下有鱸鱸肥膾堪切炊

杭調橙蠶飽食不為餐月從洞庭來光映寒湖凸長橋  
坐虹背衣濕霜未結四顧無纖雲魚跳明鏡裂誰能與  
子同去若秋鷹掣手

送撫州通判袁世弼寺丞

帆疏疏纖綠蒲二十四幅輕江湖高秋逆水上天去朝  
過瓜步暮濡須長風沙頭問鯉魚大孤山側鳴寒鳥魚  
腹無書報家信憑烏為到西山區西山松柏應更好及  
取之官來拜埽

送石昌言舍人使匈奴

燕然山北大單于漢家皇帝與璽書持書大夫腰金魚  
飛龍借馬出國都胡沙九月草已枯草上霜花如五銖  
白裘貂帽著不暖莽莽黃塵車款款野廬邊月出隴來  
風靜天遙鴈聲短聞到蜀庭尤苦寒譯言揉耳不譏彈  
公於是時已觀禮踏雪再拜辭可汗

依韻和宋中道觀八月二十八日車駕朝謁景

靈宮

都人夾望禁槐傍  
闔闔初來旭日光  
雕玉翠鞍牽驤褭  
盤龍朱輦爛文章  
焚香閔殿開嚴帳  
汲水寒溝灑廣莊  
一見天顏萬人喜  
却迴宮禁樂聲長

度支蘇才翁挽詞三首

子美同葬

二十識君貌交游非一朝  
魄光沉碧海志業隕青霄  
洛客舊為社楚人今作招  
素車京峴路應不似焦嶢  
盛世雖多士唯公與衆殊  
高才飛健鶻逸句吐明珠  
未入周官采爭持楚璞模  
莫悲泉骨朽青史見賢愚

自昔愛春物樽深眼底紅日斜花在落身醉客西東歿  
數千年隔生悲百事空君嘗知此理不悞學陶公

重送袁世弼

臨川內史謝康樂貝葉翻經有故臺春草生塘猶夢句  
秋蕓出水似君才駮雞肥脆聊供膳竊酒甘濃可薦杯  
亦說右軍遺跡在墨池科斗喜風雷

留題景德寺吉祥講僧

我講異爾講我書非爾書彼將希白馬此亦猶大車皆

行國都內轍不入委閭世人日擾擾來慕清涼居

閤門水

朝堂嘉祐元年九月九日宿齋  
歐陽永叔張叔之孫之翰命賦

宮井固非一獨傳甘與清釀成光祿酒調作太官羹上  
舍銀餅貯齋廬玉茗烹相如方病渴空聽輶轡聲

朝堂宿齋

玉屬陪祠日宮廬寓宿時鐘來建章遠月過羽林遲寒  
入青綾被風牽翠鳳旗賈生誰復召安問鬼神為

送杜挺之郎中知虔州

大庾嶺邊無臘雪惟有梅花與明月月光如水來向人  
太守得閑杯耳熱吹香入酒望梁宋正是苦寒縣可折  
亦當念君君行南南方無冰地不裂此身不到五侯門  
肥羔釀酒槐槽咽玉色少年生頰春解笑吟腸冷如鐵  
衝風冒霰入廣文老與諸生開反切重嗟君遠隔江湖  
雖得豐甘牙已缺官娥執樂一千指脩頸慢肌衣錯纈  
定逢賓客彊排娖舞徹六么紅袖掣人競羨君君愈疲  
夜歸坐閣思予說



送吳辯叔知鞏縣

言為西邑宰本是洛陽人  
送驛往歸魏迎車來入秦  
山川成鞏固陵廟壯威神  
好學河陽政栽花作縣春

當世家觀畫

冰蠶吐絲織纖紈妙娥貌

入聲

玉輕邯鄲曲眉淺臉鵝髮

盤白角瑩薄垂肩冠銅青羅衫日月團紅裙撮暈朝霞  
乾手中把筆書小字字以通情形以觀形隨畫去能長  
好歲歲年年應不老相逢熟識眼生春重伴忘憂作萱

草

送韓僉判玉汝還南京

持賀太  
禮表

天子甘泉祀歡聲浹九圍  
綠章馳騎入朱服佩魚歸  
賦雪上賓席買鬣更舞衣  
清池無限鴈莫道信音稀

宛陵集卷四十九

欽定四庫全書

宛陵集卷五十

宋 梅堯臣 撰

桃花源詩

并序

嘉祐元年予在京師邂逅與都官員外郎張侯顥遇于書肆中張語往時相識於唐俞家今二十三年矣因各言出處張曰實居武陵武陵舊蹟可具道始時陶潛為記與詩其後往往賦詠不絕君之仲父昔嘗有作聞君能詩多為公卿大夫諷誦願得一章夸詫遠土亦當買

石刊置巖下既重其意許其錄幼時所為五言歸閱故  
藁則頗不愜心遂別為一章以塞張侯之請

鹿為馬龍為蛇鳳皇避羅麟避豈天下逃難不知數入  
海居巖皆是家武陵源中深隱人共將雞犬栽桃花花  
開記春不記歲金椎自劫博浪沙亦殊商顏采芝草唯  
與少長親胡麻豈意異時漁者入各各因問人間賒秦  
已非秦孰為漢奚論魏晉如割瓜英雄滅盡有石闕智  
惠屏去無年華俗骨思歸一相送慎勿與世言雲霞出

洞沿溪夢寐覺物景都失同迴槎心寄草樹欲復往山  
幽水亂尋無涯

永叔席上分韻送裴如晦

得黯字

霜華夜夜濃汴水日日減行邁唯恐遲離懷不須黯遠  
輕吳江潮乃見丈夫膽君意應洗然吾方困塵慘

永叔白兔

可笑嫦娥不了事走却玉兔來人間分寸不落獵犬口  
滁州野叟獲以還霜毛茸茸目睛殷紅絛金練相繫掇

馳獻舊守作異玩况乃已在蓬萊山月中辛勤莫擣藥  
桂倚杵白今應閑我欲拔毛為白筆研朱寫詩破公顏

直宿廣文舍下

前夜宿廣文葉響竹打雪昨夜宿廣文窗影竹照月賴  
此數竿竹與我為煖熱上有寒鵲棲拳足如瘦蕨平明  
欲飛去喈喈若告說我無喜可報煩爾弄觜舌亦嘗苦  
老鷄鳴噪每切切為學本為道窮感令素髮但能得酒  
飲終日自兀兀

送宋中道太博倅廣平

行役無冬春車馬無南北急若機上梭離別腸自織其  
間走聲利晝夜不能息晚得二友生胸蛻吐五色各思  
強祿仕安肯坐仰食一之毛遂鄉一之太伯國豈無穎  
脫才可邁古風力明當隔大河去路指斗極誰念平原  
君能於衆中識

裴如晦時  
亦宰吳江

送宋端明知成都

其兄相國  
新鎮河陽

伯仲俱邦棟朝廷倚以隆出為周九牧入是漢三公歲

易星辰轉天均雨露同威聲滿河北事業出山東賦壓  
臨邛馬文高益部雄英靈當自伏教化已先通穀騎花  
川隘壺漿錦里空道塗來笮馬都邑賈郾筒刀夢殊祥  
後鋒車急占中春江須愛賞花鳳在梧桐

戲作嫦娥責

我昨既賦白兔詩笑他嫦娥誠自癡正值十月十五夜  
月開冰團上東籬畢星在傍如張羅固謂走失應無疑  
不意嫦娥早覺怒使令烏鵲繞樹枝啁噪言語誰可辨



徘徊赴寢寒帷又將清光射我腹但覺軫粟生枯皮  
乃夢女子下天來五色雲擁端容儀雕瓊刻肪肌骨秀  
聲音柔響揚雙眉以理責我我為聽何擬玉兔為凡卑  
百獸皆有偶然白神靈觸冒由所推裴生亦有如此作  
專意見責心未夷遂云裴生少年爾謔弄溫軟在酒卮  
爾身屈強一片鐵安得妄許成怪奇翰林主人亦不愛  
爾說爾猶自惜知不知叩頭再謝沈已去起看月向西  
南垂

送李涇州審言二首

古章乘一障不過提千兵今握數萬衆獨自制名城諸  
將俯聽命莫敢輒吐聲堂下選驍裒帳中圖崢嶸山川  
在目中原寇來必平誰人識謝艾只是一書生

漢家舊日回中路天子新除太守行牙將握刀趨遠驛  
羌人下馬拜高旌雲間白草開邊隴山上朱樓壓郡城  
勇脫區區簿書內壯心應欲請長纓

送刁景純學士使北

嘗聞朔北寒尤甚已見黃河可過車驛騎駸駸持漢節  
邊風慘慘聽胡笳朝供酪粥冰生椀夜臥氍毹月照沙  
侍女新傳教坊曲歸來偷賞上林花

送馬仲塗司諫使北

每逆龍麟司諫諍又持旄節使陰山貂裘不見風霜勁  
鴈磧遙知道路艱冰膾芥齏非楚味玉苕蘭茁說燕顏  
單于不敢輕中國名馬新調為送還

重賦白兔

永叔云諸君所作皆以嫦娥月宮為說頗頗吾兄以他意別作一篇庶幾

高出羣類然  
非老筆不可

兔氏穎出中山中衣白兔褐求文公文公嘗為穎作傳  
使穎名字存無窮徧走五嶽都不逢乃至琅邪聞醉翁  
醉翁傳是昌黎之後身文章節行一以同滁人喜其就  
籠絀遂與提携來自東見公於鉅鰲之峰正草命令辭  
如虹筆禿願脫冠以從赤身謝德歸蒿蓬

王初公北園

園林多高樛園卉多芳柔紅紫經幾春青枯經幾秋我

至每懷浮觴之卿翁但見浮觴之水汨汨流水流日夜  
曾未休高門世世生賢侯不比平泉碑缺花木記又非  
家鷗嘯鳳皇樓洛陽城中亦有園與宅常同歐陽翰林  
攜酒遊竹間池館遺翠羽戶外楊柳繫紫騮今嗟齒似  
舊屐作博士嘉趣只與心相仇彊騎瘦馬往城北二十  
三年如轉頭歸來作此辭且應主人求

觀楊之美盤車圖

谷口長松葉老瘦澗畔古樹身枯高土山慘澹遠復遠

坡路曲折盤車勞二車迴正轅接軫繼下三車來嶷嶙  
過橋已有一乘歇解牛離軛童可晒黃衫烏巾驅舉鞭  
經險就易將及前轂輪傍側輻可數蹄角挽錯卷箱聯  
古絲昏晦三尺絹畫此當是展子虔坐中識別有公子  
意思往往疑魏賢子虔與賢皆妙筆觀玩磨滅窮歲年  
塗丹抹青尚欺俗旱龍雨日猶賣錢是亦可以祕疑亦  
不可捐為君題卷尾願君世世傳

寄許越州

開元冠蓋裏無若賀知章  
乞得鏡湖水洗出明月光  
行坐鏡與月身衣羽人裳  
心存黃庭經目視白鳥行  
歲時忽已古高韻抗彭莊  
今聞許子春來守稽山  
倚稽山風月在鏡水  
菰蒲長臘市開梅萼霰  
雪凌早芳臥龍生茗舌  
鼓角催新陽焙邊可以  
啜樹間可以觴賀老於  
當日必定無此嘗  
唯有李白詩酒船芙蓉  
香安得效白也  
賸載借餘艍與君同醉  
翁智慮收肝腸

永叔請賦車螯

素脣紫錦背漿味壓蚶菜海客穿海沙拾貯寒潮退王  
都有美醞此物實當對相去三千里費力致以配翰林  
文章宗炙鮮尤所愛旋坼旋沽飲酒船如落埭殊非北  
人宜肥羊啗蠻塊

寄題郢州白雪樓

楚之襄王問於宋玉玉時對以郢中歌歌為白雪陽春  
曲始唱千人和再唱百人逐至此和者纔數人乃知高  
調難隨俗後來感慨起危樓足接浮雲聲出屋中古客



應無怙悵鯢魚孟諸宿樓傾復構春又春酒瀉琉璃烹  
錦鱗青山繞欄看不盡眼穿盪漿石城人去知何在寒  
花雨斂自生頻今聞太守新梁棟試選清喉可動塵

和永叔荅劉原甫遊平山堂寄

黃土坡陀岡頂寺青煙幕歷浙西山半荒樵牧舊城下  
一月陰晴連嶼間人指廢興都莫問眼看今古總輸閑  
劉郎寄詠公酬處夜對金鑾步輦還

平山堂留題

蜀岡莽蒼臨大邦雄雄太守駐旌幢相基樹楹氣勢厖  
千山飛影橫過江峰嶠俯仰如奔降雷塘波小灘鵝雙  
陸羽井苔黏瓦缸煎鐺瀉頂聲淙淙雨牙鳥爪不易得  
碾雪恨無居士龐已見宣城謝公陋吟看遠岫通高窗

送張子卿秀才

公武

茫茫九土中天網該時秀有鳳不收羅有麟不獲狩賢  
豪為咨嗟都邑誦瓊琇而我當是時欲見恨未遘忽過  
廣平居遇子乃邂逅懷中二新篇幸出洗昏瞶一美韓

公才

雅圭也

一語南方寇鏗然青琅玕交戛風雨驟輒用

告衆多亦未甚便售固知至珍物不入市井貿昨朝驚  
扉鳴始悟子來扣鉅編高貯襟細卷仍函袖麻衣踏屨  
韉再拜謹以授因之重感愴世德實有舊文體古為徒  
家聲喜能又其間贊愚辭愧累將恐詬磨拂李杜光誠  
與日月鬪退之心伏降安得此孤陋豈能造春榮豈解  
易星宿一身猶寒飢生未飽藜豆高高河漢流肯下饋  
湔漱蟲魚儻無施捉撮不乖繆聊此慰窮愁文章終莫

就庭前枯石榴寒雀並清晝逍遙獨詠歌寄翼與報訓

江鄰幾學士寄酥梨

興平烹瓊乳咸陽摘冰枝秦女點山日張公開谷時刻  
破玉漿壺泛融金酒卮適從關中寄不見博士卑

荅劉原甫寄糟薑

名國萬家城千畦等封侯斲當燕去前醃牙費糟邱無  
筋偃王笑有味三閭羞寄入翰林席聖以不撤優又寄  
蓬門下作賦誰肯休唯我廣文舍免為齏鹽仇劉公漢

家齋才學歆向儔  
曾懷飽經史辨論出九州  
曾不奉權輿  
但與故人投贈  
辛非贈甘此意當自求

銅雀硯

歌舞人已死  
臺殿棟已傾  
舊基生黑棘  
古瓦埋深耕  
玉質先骨朽  
松棟為埃輕  
築緊風雨剥  
埏和鉛膏精  
不作鴛鴦飛  
乃有科斗情  
磨失沙礫粗  
扣知金石聲  
初求畎畝下  
遂廁几席清  
入用固為賢  
論古莫與并  
端溪割紫雲  
空負世上名  
韓著毛穎傳  
何獨稱陶泓  
儻以較歲年

況當視如兄

歐陽永叔王原叔二翰林韓子華吳長文二舍

人同過樊廬值出不及見

十二月七日

枯竹為門扉不可容車騎況如鄭廣文無羶藉賓位窮  
冬月破七賢客聯玉轡傳騶肅里閭下榻呼童稚問我  
何所往共留牆上字兒愚不知誰金章言照地既屈卿  
大夫恨莫親帚彗星躔回已高麟趾寧復至戢戢鄰巷  
居相見竊自喟豈料瘦老翁能令賢達至昔時蓬蒿徑

安有此盛事

元忠示胡人下程圖

單于獵罷臥錦紅解鞍休騎荒磧中  
蒼駒駟駱六十匹  
隱谷映坡分尾髮九駝五牛羊頗倍沙草  
晚牧生寒風  
賈賤小大指五百執作意態皆不同  
二鷹在臂二鷹架  
駿大當對寧爭功  
羶廬鼎列帳幕擁鼓角未吹驚寒鴻  
土山高高置烽燧  
毛囊貯獲閑刀弓  
水泉在側挹其上  
長河杳杳流無窮  
素紉六幅筆何巧  
胡瓌盡妙誰能通

今日都城有別識別識共許劉元忠

送李太保知儀州

出塞開牙帳論兵啓玉鈐漢泉思白馬秦冢弔蒙恬族  
本西山大聲從渭北兼相如嘗學劒文士亦何嫌

劉元忠遺金橘

南方生美果且體橘包微韓彈有輕薄楚萍知是非甘  
香奉華俎咀嚼破明璣欲換齏鹽腹盈匱忽我歸

王原叔內翰宅觀山水圖



石蒼蒼連峭峰大山嵯峨雲霧中老松瘦樹無筆蹤巧  
奪造化何能窮古絹脆裂再黏續氣象一似高高嵩上  
有荆浩字特歸翰林公願換廷圭一丸墨誰言賣錢須  
青銅范寬到老學未足李成但得平遠工黃金白壁未  
為寶文人師臣無不通

送瘳倚歸衡山

倚來為其兄求集  
序於歐陽永叔

雌猿夜啼別湘東曉尋故人背孤桐孤桐有聲彈不響  
絃絕曲在埋蒿蓬知音萬古期必逢今日已聞天下雄

陟山涉水不辭遠文章大名居禁中扣門一見顏色喜  
抱琴三歎含徵宮九疇不汨微禹力堯舜豈無明與聰  
推根致本賢意合敘述况值太史公貿金得玉莫忘寶  
却過洞庭乘朔風援休啼月月色好還來舊山伴狙翁

宛陵集卷五十

欽定四庫全書

宛陵集卷五十一

宋 梅堯臣 撰

還吳長文舍人詩卷

松液花茯苓又因為琥珀遇物必得形毛髮曾不隔君  
子亦豹變其文蔚可覲今者逢吳侯滿腹貯經籍噴吐  
五色霓自堪垂典冊詩教始二南皆著賢聖跡後世竟  
翦裁破碎隨刀尺我輩彊追仿畫龍成蜥蜴有唐文最  
盛韓伏甫與白甫白無不包甄陶咸所索侯初守二郡

山水多助益升高觴嘉賓賦筆速鷹翮書成大軸許  
我觀琮璧真物固易辨恨無百金易借徒懷袖歸誦玩  
廢朝夕譬如遊國都惆恍失阡陌苦吟三十年所獲唯  
巾幘豈比夸受降甲齊熊耳積重見元和風珠玉敵海  
舶自慙寒餓為何張空避席

和正月六日沈文通學士遺溫柑

禹書貢厥包未知黃柑美競傳洞庭熟又莫永嘉比適  
觀隱侯詩獲此殊可喜誦句擘露囊香甘冷熨齒明朝

鑠禮闈何暇醉鄰里

史供奉羣鶴

出珥銀貂侍太清  
迴看雙鶴舞中庭  
翩翩曾是仙人驥  
兩兩尚儀君子形  
靜夜欲還緱嶺月  
終朝思噉太湖萍  
莫將樹上雞相並  
會待歸飛向杳冥

雪竇達觀禪師見寄依韻荅

巖竇常留雪山雪  
不有心禪衣百衲重  
香刹四明深馴鹿  
來銜果栽松去作  
林自緣冠紱累未  
解遠公尋

和孫端叟寺丞農具十三首

田廬

結廬野田中其高足以覘坐臥劣自容巢棲未嘗斂但  
能風雨蔽何惜茅蓬苦終當收穫畢寂寞懸山店

颺扇

田扇非團扇每來場圃見因風吹糠粃編竹破筠箭任  
從高下手不為暄寒變去麤而得精持之莫肯倦

樓種

農人力已勤要在布嘉種手持高斗柄背瀉三犁墾月  
下叱黃犢原邊過廢冢安知俠少年玉食金羈擁

樵斧

適從伐枯桑莫悟刀已缺蠶工向欲迫田事不可徹丁  
丁背谷聲役役持柯熟積薪高於山焉用先後別

耒耜

古聖通物宜揉斲資粒食稼穡盡民勤墾耕窮地力推  
化本神農維時思后稷我老欲歸田茲器已先識

錢鏐

詩稱庠錢鏐南畝興農作寧唯務芟雉豈不在刈穫收  
功尚嘉穀託用隨芒屨太平茲所重坐見銷鋒鏑

耒鉏

蕪穢或不治良苗安得長  
薈來露未晞荷去月初上  
侵煙濕鵝頸近芡翻蟻壤  
生具自有餘何醉汗霑顙

襖襖

上襖與下襖青萐苦能織  
曉披春雨來晚曬陽披側  
蔽



身常自足衝濕曾為得任從野風吹已敵寒蓬色

臺笠

力田冒風雨緝穰為臺笠寒蓑相與用陰野低迷入足  
屨固易濡鬚葆何嘗濕斯須未可去赫日實乃急

水車

既如車輪轉又若川虹飲能移霖雨功自致禾苗稔上  
傾成下流損少以益甚漢陰抱甕人此理未可諗

田漏

瓦罌貯谿流滴作耘田漏不為陰晴惑用識早暮候辛  
勤無侵星簡易在白晝同功以為準一決不可又

耘鼓

挂鼓大樹枝將以一耘耔逢逢速遠近汨汨來田里功  
既由此興餉亦從此始固殊調猿猴欲取兒童喜

牧笛

牧人樂下牧背騎吹短笛聲穿吳雲低韻入楚梅的誰  
嗟苦調急自與幽意寂應同堯時民歌將土壤擊

和孫端叟蠶具十五首

繭館

漢儀后親蠶採桑來繭館雲母飾車上鉤籠載車畔援  
條露已乾受葉日將晏為言天下婦茲事不可慢

織室

常聞漢皇后織室數來觀宮女豈不勤帝袞得以完亦  
將成纁黃非用競龍鸞意在奉宗廟後人其可安

桑原

原上種良桑桑下種茂麥雉雛麥秀時蠶眠葉休摘空  
條漏日多餘堪更誰惜會待黃落來酒壚燒斗石

高几

桑柔不倚梯摘桑賴高几每於得葉易曾靡憂校披躋  
陞類拾級下上異緣蟻閑置草屋倚鳴雞或棲止

科斧

科桑持野斧乳濕新磨刃繁拊一去除肥條更豐潤魯  
葉大如掌吳蠶食若駿始時人謂戕利倍今乃信

桑鉤

長鉤扳桑枝枝間挂桑籠南陌露氣寒東方日光動少  
婦首且笄幼女角已懸競以採葉歸曾非事梳攏

桑宮

采采向桑郊盈盈自持宮挂鉤帶月往穉葉和煙貯一  
心恐蠶飢搔首促儔侶到家傾嫩綠刀几為咬咀

蠶女

自從蠶蟻生日日憂蠶冷草室常自溫雲髻未暇整但

采原上桑不顧門前杏辛苦得絲多輸官官莫省

蠶簇

冰蠶三眠休作繭當具簇漢北取蓬蒿江南藉茅竹蒿  
疎無鬱浥竹淨亦森束競畏風雨寒露置未如屋

蠶槌

三月將埽蠶蠶妾具其器邱植先得

音摘

括辟室亦塗墍

衆材疎以成多薄所得寄終老歸簇時應無慙弃置

蠶薄

河上緯蕭人女歸又織葦相與為蠶曲還殊作筠篚入  
用此何多往售獲能幾願豐天下衣不歎貧服卉

繰盎

朝漬一盎繭繰就幾絢絲絲成繭已盡盎亦誰復持道  
上有墮甌車傍有鴟夷二物且莫笑顧藉各因時

紡車

蠶月必紡績絲車方挑擲燈下絡緯鳴林端河漢白纖  
縷自有緒虛輪運無跡腕手已為勞誰經用刀尺

龍梭

給給機上梭往返如度日一經復一絲成寸遂成匹虛  
腹銳兩端素手投未出陶家挂壁間雷雨龍飛出

織婦

織婦手不停心與日月速常憂里胥來不待雞黍熟但  
言督縣官立要斷機軸誰知公侯家賜帛堆滿屋

上元從主人登尚書省東樓

閭闔前臨萬歲山燭龍銜火夜珠還高樓迴出星辰裏



曲蓋遙瞻紫翠間  
軋軋車聲碾明月  
參差蓮燄競紅顏  
誰教言語如鸚鵡  
便著金籠密鎖關

自和

沉水香焚金博山  
杜陵誰復與車還  
馬尋綺陌知何曲  
人在珠簾第幾間  
法部樂聲長滿耳  
上樽醇味易酡顏  
更貧更賤皆能樂  
十二重門不上關

又和

康莊咫尺有千山  
欲問紫姑應已還  
人似嫦娥來陌上

燈如明月在雲間  
車頭小女雙垂髫  
簾裏新妝一破顏  
却下玉梯雞已唱  
謾言齊客解偷關

和公儀龍圖戲勉

五公雄筆廁其間  
媿似邱陵擬泰山  
豈意來嘲飯顆句  
忙中唯此是偷閑

再和公儀龍圖

千重海浪漁人醉  
百戰沙場野叟閑  
豈向鬧中還得靜  
乃知朝市即青山

放鵝

獸烹羊豬鳥烹鵝雞唯鵝不殺置奴而攜公坐堂上見  
而悲悽急令開笈還故棲其間無力飛不齊公只知魚  
之洋洋鵝之鵝鵝噫兮噫兮

莫登樓

莫登樓脚力雖健勞雙眸下見紛紛馬與牛馬矜鞍轡  
牛服輶露臺歌吹聲不休腰鼓百面紅臂鞬先打六么  
後梁州棚簾夾道多天柔鮮衣壯僕髯虬寶撾呵叱

倚王侯夸妍鬪豔目已偷天寒酒醺誰爾倚倚檻心往  
形獨留有此光景無能遊粉署深沉空翠幃青綾被冷  
風颼颼懷抱既如此何須望樓頭

莫飲酒

莫飲酒酒豈讎顏回不飲不白頭千鍾稱帝堯百觚號  
聖丘定國數石無滯留康成三百杯未休阮籍作詩語  
更道聖賢在前誰與謀喉乾舌強須潤柔照見文字勝  
膏油

依韻和永叔勸飲酒莫吟詩雜言

我生無所嗜唯嗜酒與詩一日舍此心腸悲名存譽大  
不輒思甌空釜冷不俛眉妻孥凍飢數恚之但自吟醉  
與世違此外萬事皆莫知王公謁請衆去早既衰愈嬾  
身到遲日高倦僕顏色沮况騎瘦馬兩耳垂猷此勞苦  
不喜出唯有文字時能為諸公尚恐竭智慮勤勤勸飲  
莫我畀再拜受公言竊意公矯時只愛詩謂余癡

和永叔內翰

來時擘繭正探官走馬傳宣夾路看便鑱青春辭上閣  
徒知白日近長安思歸有夢同誰說強意題詩只自寬  
猶喜共量天下士亦勝東野亦勝韓

和公儀龍圖憶小鶴

聞憶華亭雙鶴雛蒼毛未變頂微朱閑情且與稻梁飽  
寄語休將雞鶩驅丁令再歸移歲月王褒端為約僮奴  
主人必欲看雙舞太液池寬肯放無

和永叔內翰思白兔荅憶鶴雜言

醉翁在東堂為他栽桂樹待將枝條與人折憶著家中  
玉色兔夜看明月海上來光彩離離入庭戶且問嫦娥  
一借觀翁家雖有來無路嫦娥對面幾萬里不聲漸漸  
西南去是時翁生懷抱惡却恨陸機先憶鶴致令亦念  
眼迷離不似傷池能飲啄始憂兔飢僮失哺又恐白毛  
塵土污仍不如鶴有淺泉自在引吭時刷羽花前舉翅  
鼓春風只待翁歸向朝暮我聞二公趣向殊一養月中  
物一養華亭雛一畏奔海窟一畏巢松株我雖老矣無

物惑欲去東家看舞姝

和永叔內翰戲荅

從他舞姝笑我老笑終是喜不是惡固勝兔子固勝鶴  
四蹄撲握長啄啄任看色與月光濕只欲走飛情意薄  
拘之以籠縻以索必不似纖腰夸倬約主人既賢豪能  
使賓客樂便歸膏面染髭鬚從今晏會應頻數

二月五日雪

二月狂風雪寒威曉更加省闈輕妒粉苑樹暗添花有



夢皆蝴蝶逢袍只紵麻凍吟誰料我相與賭流霞

聞永叔謂

子華曰明日聖俞若無詩脩輸一杯酒

### 和公儀龍圖小桃花

三分春色一分休始見桃花著樹頭霰雪斗來如約勒  
為公留作上林遊

### 感李花

二月九日

重門雖鎖春風入先折桃花後李花赤白鬪妍思舊曲  
舊聲傳在五王家五王不見留華萼華萼壞來碑缺落


當時李白欲騎鯨  
醉向江南曾不錯

琴高魚和公儀

大魚人騎上天去  
留得小鱗來按觴  
吾物吾鄉不須念  
大官常膳有肥羊

嘗茶和公儀

都藍攜具向都堂  
碾破雲團北焙香  
湯嫩水輕花不散  
口甘神爽味偏長  
莫夸李白仙人掌  
且作盧仝走筆章  
亦欲清風生兩腋  
從教吹去月輪傍



宛陵集卷五十一

欽定四庫全書

集部

宛陵集卷五十二至五

詳校官庶吉士<sub>臣</sub>張溥

檢討<sub>臣</sub>何思鈞覆勘

覆校官博士<sub>臣</sub>劉光第

校對官主簿<sub>臣</sub>汪日贊

謄錄貢生<sub>臣</sub>許立璽

欽定四庫全書

宛陵集卷五十二

宋 梅堯臣 撰

刑部廳看竹效孟郊體和永叔

韻用其

蒼蒼庭中竹事莫歎遲速不同欄下草一歲一迴綠朝  
開花照曜暮落風相逐何如飽霜雪冬夏森寒玉誰將  
種官舍本合近巖屋不可一日無瀟灑看未足阮生豈  
其愚林中醉醺醺我當明月時移牀來此宿

較藝和王禹玉內翰

分庭荅拜士傾心却下朱簾絕語音白蟻戰來春日暖  
五星明處夜堂深力撻頑石方逢玉盡撥寒沙始見金  
澹墨牘名何日出清明池苑可能尋

再和

廉纖小雨破花寒野雀爭巢鬪作團手卷白雲光引素  
舌飛明月響傾盤羣公錦繡為腸胃獨我塵埃滿肺肝  
彊應小詩無氣味猶慙白髮廁郎官

謝永叔荅述舊之作和禹玉

天下才名罕有雙今逢陸海與潘江  
筆生造化多多辦  
聲滿華夷一一降金帶繫袍迴禁署  
翠娥持燭侍吟窗  
人間榮譽無如此誰愛區區擁節幢

較藝贈永叔和禹玉

今看座主與門生事事相同舉世榮  
並直禁林司詔令  
又來西省選豪英飛龍借馬天邊下  
光祿供醪月底傾  
食葉蠶聲句偏美當時曾記賦將成

戲荅持燭之句依韻和永叔



盧仝只有赤脚婢吏部曾吟似笑仝紅燭射眸從結客  
清歌帖耳苦憐翁歸時雖已過寒食芳物猶能逐暖風  
但點紗籠續清夜西園遊興古何窮

重答和永叔

我家唯有一團月挂在颼颼草屋東玉兔已為公取玩  
更休窺望桂叢中

又依韻

多病相如不復云更何曾有卓文君他時我向會稽去

只是荆釵與布裙

刑部廳海棠見贈依韻荅永叔二首

搖搖牆頭花萼萼有  
好色高枝笑粲粲低  
枝明皜皜但與風相  
撩不與風相得風吹  
莫苦急游子歎日昊  
彭祖與顏回相去猶  
瞬息每觀形影篇曷  
在神所釋不可廢  
我吟畢竟焉免白

搖搖牆頭花一一如  
舞娥春風買豔逸豔  
逸此何多不為游蜂  
撓即為狂蝶過日光  
苦給給魯叟白波波  
波人生

若朝菌不飲奈老何揚雄寂寞居豈若阮生歌

春雨呈主文

蛟龍上漢魚潛動梁棟生雲燕未知風點稍聞寒瓦急  
玉條初向畫簷垂何郎夜聽應逢句謝朓朝觀必有詩  
老大莫將文字困為公牽彊不勝疲

謝鵬和公儀

聞有白鵬夢遂作白鵬詩詩記白鵬語意公於鶴私公  
意無薄厚爾將聽我辭朝給一瓢水晝給一盞糜曾不

令爾渴曾不令爾飢事事不異鶴安得於鶴疑鶴鳴爾  
不和鶴舞爾不隨無以一供悅飽食蕃頑癡公所念爾  
久李白當畜之白固有篇詠公偶未暇為遣爾心不平  
謂此鈍見遺我持爾此意請公吟莫遲公便納我言濡  
筆灑淋漓書爾在南方野羽霜雪披弄啄紅豆實飛上  
桄榔枝翡翠不敢顧孔雀不敢窺將擬是白鳳脩尾畫  
連漪虺頸而雞首戔戔如有儀而今與鶴爭此識固已  
卑公初待爾厚鵬兮知不知

較藝將畢和禹玉

窗前高樹有棲鵲記取明朝飛向東家在望春門外住  
身居華省信難通夜聞相府催張牘曉聽都堂議奏中  
龍閣鳳池人漸隔猶因朝謁望鰲宮

送白鵬與永叔依韻和公儀

致鵬猶恐鵬飢渴細織筠籠小瓦缸玉兔精神憐已久  
金鑾人物世無雙休爭白鶴臨清沼且伴鳴雞向綠窗  
美羽奇毛有多少爾身高穩勝他邦

書事和韓子華舍人

見憑蝴蝶過牆飛却夢翩然入綺闌欲撲翅輕縈不住  
覺時疑有粉霑衣

明經試大義多不通有感依韻和范景仁舍人  
明經與進士皆欲取公卿自是俗儒陋非於吾道輕昔  
由羔鴈聘今乃草萊并不措一辭去緣何祿代耕

出省有日書事和永叔

辭家綵勝人爲日歸路梨花雨合晴庭下鞦韆應未拆

籠中鸚鵡即聞聲  
千門走馬將看牘  
廣市吹簫尚賣餠  
已是瓊林芳卉晚  
不須遊處避門生

定號依韻和禹玉

言出君門日遙聞  
紫禁鐘詔書中使  
降駿馬上閑供天  
下持平手毫偏不  
置胸文從有司較  
卷是近臣封勝陣  
無容敵精兵已善  
攻明朝當奏號駕  
鷺看歸雖

寄桂州張諫議和永叔

桂林太守幾時行  
泛汴桃花浪已騰  
目極雲陰低遠樹

夜寒風急亂春燈  
巢鳴翡翠愁無恨  
水宿鴛鴦冷不勝  
陽朔山前好峰嶺  
為公憐愛萬千層

觀張中樂書大字

芝旭馳名世有孫  
大書如曉過秋原  
長松怪柏皆成炭  
豫氏觀傍不解吞

張淳叟獻詩永叔同永叔和之

張君獻詩詩詞巧  
美女插花嬌醉春  
公荅七言夸筍筍  
我無千里學騏驎  
夜吟謝朓澄江練  
露濕陶潛漉酒巾



歸去應將錦囊貯已勝珠玉莫愁貧

上馬和公儀

煙火千門曉欲開五花驕馬肯徘徊井間已是經時隔  
親舊全如遠別來帝闕重看多氣象天街新霽少塵埃  
振冠浣服無容久便見池門放牘催

太師杜公挽詞五首

國佐三公進師臣一品歸接賓忘素餐還綬遠危機憶  
奉追尊冊當觀副輅旂生榮人莫及無恨掩泉扉

慶歷  
中改

謚章聖五后公奉冊  
乘副玉輅出宣德門

既老仍開國因歸得賜金念懷知主意堅介見臣心筆

札尚存紙性情猶託吟向來門下客東首淚盈襟

前歲  
因侍

講王內翰歸省其兄  
於睢陽上賜公金

莫怪霑襟血無由作弔賓故池歸去鴈春信見何人已

寫虛堂影猶鐫守冢麟門生與舊吏將立道傷珉

言為當代法行不古人慙天子賢元老史官傳美談名

高漢亞相學嗣晉征南有子即家寶未嘗金玉貪

見錄尋常詠親裝復手題言從永嘉後重與建安齊自

古難知已孤生每擇棲春風寄黃鳥為向墓間啼

去歲同在

植郎中謁公公出

手裝僕詩一軸

送方云秀才下第

從來釣者意豈不在得魚餌寡魚口多曾非投竿疎向  
登百金費首尾必吹噓竭澤古所戒但保腹中書風雷  
變有時且復歸孟豬

送張待制知越州

滄海東邊會稽郡朱輪遠下相臣家已同雲漢星庭轉  
不與鑑湖風月賒越箭抽萌供美茹秦山堆翠照高牙  
買臣嚴助前時譽破盜論功未足誇

送甥蔡駟下第還廣平

爾持金錯刀不入鵝眼貫已遭俗弃擲妄意堪憤惋他  
時有識別終必為寶玩懷之歸河朔慎勿輒鎔鍛改作  
毛遂雖穎脫奚足算

送唐紫微知蘇臺

洞庭五月水生寒  
盧橘楊梅已滿盤  
泰伯廟前看走馬  
闔閭城下見驂鸞  
吳娃結束迎新守  
府吏趨鏘拜上官  
曾過揚州能慣否  
劉郎蓋底勸須寬

韓持國遺洛筍

龍孫春吐一尺芽  
紫錦包玉離泥沙  
金刀瓘錯截嫩節  
銅駝不與大梁賒  
持寄韓郎綠蒲束  
莫令衛女苦思家  
韓郎才調偏能賦  
分餉唯思楚景差  
因之善謔誦淇澳  
欲學報投無木瓜

萊宣遺酒

白日對芳樹靜夜愛明月我飲雖不多杯杓安可闕破  
屋有空缸冷竈無黔突投餐開韓辱乞食使陶訥鑒此  
不求人終身其鏤骨儻有佳客過未免貫袍笏風從東  
南來語向西北發西北多鳳雛枝間報清越玉壺盛曉  
露贈置醉莫歇却少可飲人為告月休沒

送王正卿寺丞赴睢陽幕

廢園孝王國離宮天子都古今雖且異文物未嘗無族

有栽槐美名從得桂殊應聞漢丞相待士倒樽壺

韓玉汝遺油

朝讀百紙書夜成幾篇書明明白晝有陽烏默默暗室  
無蟾蜍目睛須藉外物光日月不到卑鄙居君能置以  
滑油壺暝照文字燈燄舒婦將膏髮雲鬢梳併底濁濃  
留脂車所益既如此所感當何如

王幾道罷磁州遺澄泥古瓦二硯

澄泥叢臺泥瓦斲鄴宮瓦共爲几案用相與筆墨假賦

無左思作書魏右軍寫初從故人來來自邯鄲下物因  
人以重謬當好事者

送咸陽主簿王祕校

昔見蘭叢芽今見連蔓瓜持入咸陽市本出故侯家五  
色相鉤帶秦人應自誇行當七月薦乞巧雜盤花

和楚屯田同曾子固陸子履觀予堂前石榴花  
堂下一匹鄭虔馬欄邊兩株安石榴但能有酒邀佳客  
亦任狂花落素甌俗女紅裙無好色主人白髮自侵頭



欲歌翠樹芳條曲已去洛陽三十秋

送史供奉汴口都大

河為中國患亦為中國利其患齧隄防其利通糧饋分  
流入浚汴萬貨郡城萃積淫或暴漲旱暵或滯寔疏導  
欲其宜經度有所異曩者多邀功用之殊未至十私而  
五公歲久害愈熾潰溢必歸尤廟堂難決議明明聖天  
子自選中常侍銀璫插在貂身小勇且智上從廣武城  
下及淮與泗迴險帖鑿繇所畫由所寄嘗以勤厥身又

能和衆吏前日有盡心于今病憔悴此職方藉人加餐  
當自為

呂晉叔著作遺新茶

四葉及王游共家原坂嶺歲摘建溪春爭先取晴景大  
窠有壯液所發必奇穎一朝團焙成價與黃金逞呂侯  
得鄉人分贈我已幸其贈幾何多六色十五餅每餅包  
青箬紅籤纏素絲屑之雲雪輕啜已神魄惺會待嘉客  
來侑談當晝永

送畢甥之臨邛主簿

自我歷官三十年有脚未曾行蜀川李白嘗言道之艱  
險長嗟難劇上青天鳥悲猿號馬蹄脫苔梯雨棧愁傾  
顛蒼崖下窺不見底但聽雷聲輓石懸湍濺曉盤青泥  
上高煙暮盤青泥到下泉劒閣如劒峴然割腸刺眼今  
古連爾去三千九百里巴山小馬烏皮韉一婦一奚行  
李單家具日貨能幾錢人皆畏避不敢往此獨敢往何  
所便况是初宦無遠適心意自許非由銓異乎哉我今

送爾徒哀憐

依韻和公儀龍圖招諸公觀舞及畫三首

落花淨埽青陰長  
野蝶閑飛綠草間  
侍從退來看鶴舞  
便將樽酒欲招閒

陰森園圃牆東地  
攜挈兒童樹下吟  
便約天邊鳳皇侶  
閱書觀畫味尤深

初約看花花已盡  
重新邀客客應歡  
真花既不能長豔  
畫在霜紈更好看

宛陵集卷五十二